

Ceannard Rannsachaidh



Fios mun Dreuchd

www.smo.uhi.ac.uk

Tha Sabhal Mòr Ostaig na charthannas clàraichte an Alba SC002



A charaid/A bhanacharaid

Tha sinn fìor thoilichte gu bheil sibh air ùidh a nochdadh ann an dreuchd Ceannard Rannsachaidh aig an t-Sabhal.

Anns a' phasgan seo, thathas air beagan fiosrachaidh a tharraing ri chèile airson blasad a thoirt dhuibh air na bhios a' dol aig a' Cholaiste agus air an t-seòrsa àrainneachd-obrach a tha againn. Tha 101 neach-obrach sa Cholaiste (cuid aig astar) agus tha eachdraidh làidir againn a bhith ag obair mar sgioba le dàimhean làidir agus feallsanachd co-obrachail. Seo mar a tha am fiosrachadh air a roinn dhuibh:

- Cùrsaichean is Oileanaich
- Roinnean na Colaiste
- Fiosrachadh Feumail Eile
- Tuairisgeul obrach
- Sònrachadh Pearsa
- Cumhachan Obrach
- Fios mu Iarrtas

Tha sinn an dòchas gun còrd na leanas ribh agus gum bi sibh airson ur n-iarrtas a thoirt air adhart chun na h-ath ìre. Ma tha ceistean sam bith agaibh no ma tha am barrachd fiosrachaidh a dhith oirbh faodar fònadh thugainn aig àm sam bith.

Le deagh dùrachdan



Ceannard Sgiobachd
01471 888 301
nnt.smo@uhi.ac.uk

Tha àrainn oideachaidh air leth aig Sabhal Mòr Ostaig. Tha na cùrsaichean agus a' Cholaiste gu lèir tro mheadhan na Gàidhlig - an aon Cholaiste den t-seòrsa seo an Alba agus san t-saoghal. Tha a' Cholaiste stèidhichte ann an Slèite anns an Eilean Sgitheanach, sgìre a tha ainmeil airson bòidhchead na h-àrainneachd.

Chaidh a' Cholaiste a stèidheachadh ann an 1973 agus bhon uair sin tha i air cliù a chosnadh air feadh an t-saoghail mar Ionad airson Cànan agus Cultar na Gàidhlig. 'S e colaiste spèisealta a th' innte, a' tabhann foghlam àrd-ìre, foghlam leantainneach agus cothroman rannsachaidh. Tha Sabhal Mòr Ostaig mothachail air cho cudromach 's a tha bunait làidir airson a' chànain, a' chultair agus nan ealan agus tha i an sàs ann an iomadh pròiseact gus seo a thoirt air adhart.

“Far am faigh a h-uile neach cothrom pàirt a ghabhail ann an leasachadh na Gàidhlig”

Amas na Colaiste

Tha Sabhal Mòr Ostaig airson a bhith na shàr ionad acadaimigeach aig cridhe leasachaidhean ann an cànan agus dualchas nan Gàidheal le bhith a' tairgsinn deagh chothroman foghlaim, trèanaidh agus rannsachaidh tro mheadhan na Gàidhlig agus le bhith a' dol an sàs gu h-innleachdach còmhla ri daoine eile, luchd-gnìomhachais agus a' choimhearsnachd air fad gus leasachaidhean sòisealta, dualchasach agus eaconamach a chur air adhart. Tha a' Cholaiste na h-àite foghlaim làn-Ghàidhlig agus na h-àite gnìomhachais làn-Ghàidhlig, le sàbhaladh, brosnachadh agus leudachadh na Gàidhlig mar phrìomh adhbhar na Colaiste.

Luachan na Colaiste – Ro-innleachd SMO

A' brosnachadh Co-ionannachd

Tha co-ionannachd aig cridhe obair na Colaiste anns a h-uile dòigh.

Miann

A' togail air soirbheachas mar Ionad Nàiseanta Cànan is Cultar na Gàidhlig gus coimhearsnachd na Gàidhlig a mhisneachadh agus a neartachadh.

A' Ghàidhlig

Tha an cànan aig cridhe obair na Colaiste agus tha sinn a' dèanamh a h-uile oidhirp airson a neartachadh agus a leasachadh anns gach raon de ar n-obair.

Sàr-ionad

Tha a' Cholaiste stèidhichte airson a bhith na shàr-ionad foghlaim, rannsachaidh agus leasachaidh, ag obair còmhla ri ar coimhearsnachdan is com-pàirtichean ionadail, nàiseanta agus eadar-nàiseanta. Tha e mar amas dhuinn taic a chur ri ar n-oileanaich agus ri ar luchd-obrach a chum maith am beatha.

Aig cridhe na Coimhearsnachd

Tha Sabhal Mòr Ostaig aig cridhe coimhearsnachd na Gàidhlig, aig ìre ionadail, nàiseanta agus eadar-nàiseanta.

Daoine

'S iad ar daoine - luchd-obrach, oileanaich, buill ar coimhearsnachd agus ar luchd-ceuma a tha sgapte air feadh an t-saoghail, an neart as motha a th' againn. Bidh sinn ag obrachadh gu dlùth còmhla riutha gus an Ro-innleachd seo a thoirt gu buil.

Fosgailte agus Onarach

Tha soirbheachas na Colaiste an crochadh gu mòr air a bhith a' dèiligeadh ri daoine gu h-onarach agus gu fosgailte agus a bhith dìreach nar cuid conaltraidh ris gach neach leis a bheil sinn ag obrachadh.

Ùr-ghnàthach

Tha a' Cholaiste air cliù a chosnadh dhi fhèin mar shàr-ionad ùr-ghnàthach aig cridhe leasachadh na Gàidhlig.

A' Cur ri luach eaconamach agus sòisealta

Tha buaidh mhòr aig obair an t-Sabhail Mhòir air eaconamaidh agus coimhearsnachd na Gàidhlig agus tha a' Cholaiste a' creidsinn gu mòr ann a bhith a' sgaoileadh nam buannachdan sin a tha i a' cruthachadh gu maith ar coimhearsnachdan air fad.

Ar Sealladh

Bidh Sabhal Mòr Ostaig mar:

Shàr ionad nàiseanta is eadar-nàiseanta airson na Gàidhlig
Shàr ionad foghlaim is rannsachaidh
Shàr ionad dha na Meadhanan is na h-Ealain Ghàidhlig
Phrìomh ionad ionnsachaidh na Gàidhlig
Shàr ionad cleachdaidh na Gàidhlig
Phrìomh àite-obrach na Gàidhlig
Làn chom-pàirtiche ann an lìbhrigeadh Plana Nàiseanta na Gàidhlig

Cùrsaichean is Oileanaich

'S e colaiste ùr-ghnàthach a th' ann an Sabhal Mòr Ostaig agus tha i na com-pàirtiche acadaimigeach ann an Oilthigh na Gàidhealtachd 's nan Eilean. Tha goireasan ionnsachaidh air leth ann, leabharlann sònraichte, spèisealta, agus tha àiteachan-fuirich agus ionad cùraim chloinne air an àrainn.

Am-bliadhna, tha 178 oileanach clàraichte air cùrsaichean àrd-ìre agus bha 1006 oileanaich againn am-bliadhna air na cùrsaichean goirid (àm na Càisge agus as t-Samhradh). A bharrachd air sin, tha mu 235 air a' Chùrsa Inntigidh - cùrsa astair do luchd-tòiseachaidh. Bidh deagh mheasgachadh de dh'oileanaich a' tighinn don Cholaiste, aig diofar aoisean agus à diofar àiteachan. 'S ann às Alba agus an Rìoghachd Aonaichte a bhios a' mhòr-chuid ach tha oileanaich air tighinn thugainn às na Stàitean Aonaichte, dùthchannan Eòrpach agus Àisia cuideachd. Ann an 2016-17, thàinig oileanaich nan cùrsaichean goirid à còrr is fichead dùthaich.

Tha luchd-ceumnachaidh an t-Sabhail air a dhol air adhart gu dreuchdan Gàidhlig ann an iomadach gnìomhachas, a' cur nan sgilean aca gu feum ann an leasachadh a' chànain. Ann an 2017 chaidh clach-mhìle shònraichte a chomharrachadh agus còrr is 1,000 oileanach a-nis air teisteanas no ceum a thoirt a-mach bho thòisich iad a' ceumnachadh ann an 1985.

Foghlam Leantainneach

Cùrsaichean Goirid - Gàidhlig - gach ìre

Cùrsaichean Goirid - Ceòl - measgachadh

An Cùrsa Inntigidh - do luchd-tòiseachaidh air astar

Foghlam Ard ìre

An Cùrsa Adhartais - do luchd eadar-mheadhanach air astar

An Cùrsa Comais - do luchd eadar-mheadhanach (làrach is astar)

Gàidhlig is Conaltradh - bliadhna cànan do dh'fhileantaich (làrach)

Ceumannan

BA (Urr) Gàidhlig is Leasachadh

BA (Urr) Gàidhlig is Ceòl Traidiseanta

BA (Urr) Gàidhlig is na Meadhanan

BA (Urr) Gàidhlig is Foghlam (teisteanas teagaisg na lùib)

BA (Urr) Cànan is Cultar na Gàidhlig

Dioplòma anns na Meadhanan Gàidhlig (PDA)

For-cheumannan

MSc Gàidhlig is Eachdraidh na Gàidhealtachd

Modal ann an Sgilean Deasachaidh

Sgilean Eadar-theangachaidh (ga dhearbhadh)

PG Cert Cultar agus Dualchas na h-Alba (astar)

STREAP - do thidsearan

Cothroman MLitt agus PhD.

Roinnean na Colaiste

Thòisich Dr Gillian Rothach mar Phrionnsapal na Colaiste san Lùnastal 2018. Tha Gillian gu mòr airson inbhe an t-Sabhail Mhòir mar phrìomh àite-ionnsachaidh na Gàidhlig agus mar phrìomh àite acadaimigeach airson foghlam tro mheadhan na Gàidhlig, a leasachadh agus a neartachadh san àm ri teachd. Tha Sabhal Mòr Ostaig mar àite-ionnsachaidh do dh'oileanaich agus mar àite-cleachdaidh don luchd-obrach.

ROINN AN FHOGLAIM AGUS RANNSACHAIDH

Tha Sabhal Mòr Ostaig ag obair aig ìre foghlaim leantainneach, àrd ìre agus aig ìre rannsachaidh. Tha sinn a' tabhann chùrsaichean mar a leanas:

Tha an t-lar-phrionnsapal agus Stiùiriche an Fhoghlaim, Dr. Marsaili NicLeòid, os cionn na roinne seo. Le còrr is 50 neach-obrach, tha farsaingeachd san roinn seo a' còmhdachadh foghlam àrd-ìre, leantainneachd, rannsachadh agus seirbheisean taic foghlaim. Tha Marsaili gu sònraichte a' coimhead ri cothroman àrd-ìre a leasachadh. Tha obair Rannsachaidh na Colaiste a' sìor dhol am meud cuideachd fo stiùir a' Mhanaidseir Rannsachaidh, le àrd-amasan airson REF 2021. Chithear barrachd mun inbhe rannsachaidh againn [an seo](#).

ROINN LEASACHAIDH

Tha leasachadh aig cridhe feallsanachd an t-Sabhail Mhòir. Tha dà phrìomh leasachadh a' dol air adhart an-dràsta. Tha iad sin nam pàirt de leasachadh na Cille Bige far a bheil sinn ag amas air baile a chruthachadh le Gàidhlig aig cridhe na cùise. Chaidh a' chiad dà thaigh a thogail o chionn còrr is bliadhna is dà theaghlach air gluasad a-staigh. 'S e pròiseact cudromach a tha seo agus bidh Donaidh Rothach a' stiùireadh na roinne seo. Tha Donnie cuideachd na oifigear air an Urras Leasachaidh againn a bhios a' togail airgead airson taic a chumail ris na leasachaidhean seo.

ROINN CHORPORRA AGUS IONMHAIS

Tha an Stiùiriche Corporra agus an Stiùiriche Ionmhais os cionn roinnean agus bhuidhnean corporra sa Colaiste, nam measg ionmhas, aoigheachd, ICT, sgiobachd, margaideachd agus pròiseactan. Tha conaltradh, leasachadh luchd-obrach agus leasachadh gnìomhachais mar phàirt chudromach den roinn corporra. Bidh an sgioba ionmhais a' cumail taic ri pròiseactan taobh a-muigh na Colaiste cuideachd m.e. Ionad Chalum Chille Ile, Cànan agus pròiseactan mar Tobar an Dualchais agus Faclair na Gàidhlig.

Bidh a' Cholaiste a' lìbhrigeadh cho-labhairtean tron bhliadhna nuair nach bi oileanaich an seo agus tha an teachd-a-steach seo gu math cudromach dhan Cholaiste. Tha cothrom ann seo a leudachadh ach 's e oileanaich làn-ùine am prìomhachas agus chan eil e comasach an dà chuid a dhèanamh air an làraich aig an aon àm air sàillibh gainnead àiteachan-fuirich.

Fiosrachadh Feumail Eile

Bidh Sabhal Mòr Ostaig a' faighinn maoinachadh bhon Riaghaltas (Achd Dualchais na h-Alba), bhon Chomhairle Mhaoinachaidh (airson foghlam leantainneach) agus bhon Chomhairle, tro OGE, airson foghlam àrd-ìre. A bharrachd air sin, bidh tabhartasan sònraichte a' tighinn thugainn m.e. airson rannsachaidh, bidh sinn a' togail airgid tro chìsean chùrsaichean agus tro aoigheachd agus àiteachan-fuirich sa Cholaiste.

Sgrìobhainnean feumail eile

[Ro-innleachd 2017-22](#)

[Rannsachadh aig SMO](#)

[Plana Cànan na Colaiste 2017-22](#)

[Aonta Thoraidhean \(Outcome Agreement\)](#)

[Sgeama Co-ionannachd na Colaiste](#)

[Plana Gnìomh Gnè](#)

Àrainneachd Bheothail

'S e stèidheachd ionnsachaidh bheothail, adhartach a th' ann an Sabhal Mòr Ostaig, a bhios ag amas air coimhearsnachd Ghàidhlig làn mhisneachd is soirbheachais a bhrosnachadh. Tha iomadh pròiseact agus buidheann stèidhichte air làrach na Colaiste (faicibh an liosta gu h-ìosal), agus iomadh tachartas ionadail air an cumail ann cuideachd.

Tha iomadh togalach againn air an làraich agus bidh buidhnean is pròiseactan stèidhichte againn a' dearbhadh cho cudromach 's a tha com-pàirteachas ann an saoghal na Gàidhlig agus mar a tha a' Cholaiste cuideachd a' cumail taic ri gnìomhachasan anns an sgìre fhèin.

Togalaichean

Àrainn Ostaig (AO)

Seo am prìomh togalach, an Sabhal fhèin, far an do thòisich foghlam Gàidhlig aig ìre colaiste ann an 1973. Thathas ga chleachdadh a-nis airson chèilidhean san Talla Mhòr, ionad-spòrs beag, oifisean air mhàl agus àite coinneachaidh nan oileanach fhèin. Tha seòmraichean cadail agus stiùidio clàraidh fuaim cuideachd stèidhichte aig AO.

Ionad Iain Nobail

Seo an togalach às ùire aig a' Cholaiste. Chaidh fhosgladh ann an 2015 leis a' Phrìomh Mhinistear Nicola Sturgeon. An seo tha roinn rianachd na Colaiste, a' mhòr-chuid den luchd-teagaisg is rannsachaidh agus clasaichean na ciad bhliadhna. Tha oileanaich rannsachaidh na Colaiste agus a' chompanaidh dealbhachaidh Cànan suidhichte an seo cuideachd.

Fàs

Seo agaibh an togalach airson bhuidhnean is ghnìomhachasan cruthachail is cultarail le measgachadh de phròiseactan is chompanaidhean stèidhichte ann.

Àrainn Chaluim Chille (ACC)

Seo far am bi tòrr dhen teagasg is ionnsachadh a' tachairt, agus tha an t-lar-phrionnsapal, an Leabharlann agus an seòmair-bidhe an seo. Tha àiteachan-fuirich air gach taobh dhen prìomh thogalach.

Pròiseactan (far a bheil com-pàirt aig a' Cholaiste)

SOILLSE

Faclair na Gàidhlig

Ainmean Àite na h-Alba

Tobar an Dualchais

Companaidhean agus Buidhnean leis a' Cholaiste

Fàs Mòr - ionad cùraim chloinne

Cànan (CGS) - Companaidh ioma-mheadhan na Colaiste

SkyeSpace - stiùidio agus goireasan clàraidh

Luchd-màil

Dualchas - ailtirean

Seumas Ó Baoighille Ltd - gnìomhachas ionadail

DEARG - Bùth ghibhitean

SEALL – companaidh ealain ionadail

Sealladh - companaidh riochdachaidh telebhisein

Young Films

–

companaidh

film

TIOTAL-OBACH	Ceannard Rannsachaidh
ROINN	Roinn an Fhoghlaim
AN URRA RI	Iar-phrionnsapal na Colaiste
UALLACH AIRSON	Roinn an Fhoghlaim - An urra ri luchd-obrach acadaimigeach/agus pròiseactan acadaimigeach (rannsachadh agus KE)
SGÈILE THUARASTAIL	Sgèile Àrd-òraidichean Nàiseanta
PRÌOMH ÀITE-OBACH	Sabhal Mòr Ostaig, Slèite, An t-Eilean Sgitheanach, IV44 8QR

PRÌOMH AMAS NA H-OBACH

A' stiùireadh ro-innleachd rannsachaidh aig Sabhal Mòr Ostaig agus ag àrdachadh inbhe na Colaiste tro bhith a' cruthachadh àrainneachd rannsachaidh am measg luchd-obrach is oileanach.

PRÌOMH UALLAICHEAN

A' stiùireadh agus a' leasachadh rannsachaidh sa Cholaiste

- A' cruthachadh agus a' cur an gnìomh Ro-Innleachd Rannsachaidh SMO
- A' stiùireadh Comataidh Rannsachaidh SMO
- A' brosnachadh àrainneachd rannsachaidh airson luchd-obrach agus oileanaich for-cheum
- A' cruthachadh àrainneachd airson luchd-rannsachaidh a tha a' tadhal air a' Cholaiste
- A' cruthachadh phrògram de sheiminearan rannsachaidh gach semeastar.

A' stiùireadh an REF (Research Excellence Framework)

- A' dealbhadh ro-innleachd REF agus ga cur an gnìomh
- Riochdachadh na Colaiste air buidhnean co-cheangailte ris an REF
- A' piobrachadh luchd-obrach agus ag obair ri targaidean airson pìosan rannsachaidh an REF
- A' cumail taic ri luchd-rannsachaidh na Colaiste a thaobh an cuid obair rannsachaidh m.e. planaichean, targaidean ùine msaa an co-bhonn ri Stiùiriche an Fhoghlaim agus na manaidsearan aca
- A' co-òrdanachadh agus a' sgrìobhadh tagradh REF anns a bheil luchd-obrach SMO

A' leasachadh ur cuid sgoilearachd fhèin

- A' neartachadh inbhe rannsachaidh na Colaiste tro bhith a' gabhail pàirt ann an obair rannsachaidh aig ìre eadar-nàiseanta
- A bhith a' leantail plana foillseachaidh a tha a' cur ri iarrtas REF na Colaiste/OGE
- A bhith a' sgaoileadh an eòlais acadaimigich do cho-obraichean tro òraidean is eile, agus dhan choimhearsnachd taobh a-muigh na Colaiste, mar a bhios iomchaidh.
- A bhith an sàs ann an teagasg aig ìre fo-cheum is/no for-cheum a bhios a' togail air na raointean rannsachaidh agaibh fhèin.

A' cruthachadh àite poblach rannsachaidh

- A' togail cheanglaichean rannsachaidh le luchd-rannsachaidh, is ionadan-rannsachaidh eile
- A' co-òrdanachadh òraidean rannsachaidh agus a' brosnachadh thachartasan den leithid aig ìrean coimhearsnachd, nàiseanta agus eadar-nàiseanta
- A' tàladh cho-labhairtean rannsachaidh/KE
- A' brosnachadh an luchd-obrach san fharsaingeachd a dhol an sàs ann an rannsachadh aig diofar ìrean
- A' cumail fios ùr air duilleagan-rannsachaidh làrach-lìn na Colaiste
- A' deasachadh Leabhran Rannsachaidh na Colaiste
- A' brosnachadh aiseag-eòlais air feadh na Colaiste agus anns na pròiseactan.

A' stiùireadh rianachd is ionmhas rannsachaidh

- A' stiùireadh buidseat rannsachaidh na Colaiste (an co-bhonn ri Stiùiriche an Ionmhais)
- A' cumail fios iomchaidh dhan oifis ionmhais a thaobh tabhartasan rannsachaidh agus pròiseactan rannsachaidh
- Ag obair air cùmhnantan rannsachaidh co-cheangailte ris an REF agus a' brosnachadh luchd-rannsachaidh gus iarrtasan ullachadh
- A' togail airgead rannsachaidh don Cholaiste agus a' toirt stiùireadh agus a' sgaoileadh fiosrachaidh do luchd-rannsachaidh a thaobh chothroman is ghairmean airson iarrtasan rannsachaidh far a bheil cothroman iomchaidh a' nochdadh
- A' dèiligeadh ri aithisgean a thèid iarraidh le luchd-maoineachaidh phròiseactan rannsachaidh
- A' cur ri Aithisgean Acadaimigeach Stiùiriche Roinn an Fhoghlaim airson Bùird Stiùiridh is Buidheann Stiùiridh an t-Sabhail.

A' cruthachadh àrainneachd rannsachaidh agus miann airson rannsachadh a dhèanamh

- A' stiùireadh oileanaich for-cheuma mar a bhios iomchaidh
- A' cur ri margaidheachd agus obair trusaidh oileanaich rannsachaidh
- A' co-òrdanachadh prògraman trèanaidh airson oileanaich rannsachaidh is luchd-obrach
- A' dèiligeadh ri iarrtasan oileanaich rannsachaidh
- A' sgaoileadh fiosrachaidh agus a' brosnachadh dhaoine gu bhith a' libhrigeadh phàipearan rannsachaidh is thaisbeanaidhean air rannsachadh/aiseig eòlais aig co-labhairtean
- A' riochdachadh an t-Sabhail nuair a thèid cùrsaichean rannsachaidh a dhearbhadh/ath-dhearbhadh
- A' cur taic ri pròiseactan rannsachaidh an t-Sabhail m.e. Soillse agus Ainmean Àite na h-Alba.

Dleastanasan eile

- A' cur ri Ro-innleachd na Colaiste
- A bhith a' leantainn riaghailtean slàinte is sàbhailteachd
- A' coileanadh agus a' leasachadh deagh-ghnè na Colaiste
- Obair iomchaidh sam bith eile a dhèanamh mar a bhios feum aig a' Cholaiste bho àm gu àm.

Buidhnean/Comataidhean SMO

Oifigear aig Comataidh Foghlaim is Rannsachaidh; Ball den Chomataidh Acadaimigeach; Ball den Chomataidh Sgeama Gàidhlig is Cuspairean Co-cheangailte (SGCC); Ball den Bhuidheann Stiùiridh; Ball den Bhuidheann Ghnìomh; Coinneamhan Roinn an Fhoghlaim; Cathraiche - Comataidh Rannsachaidh SMO; Comataidh an Leabharlainn; Bòrd Stiùiridh Shoillse.

Buidhnean/Comataidhean OGE

UHI REF Managers' Group; UHI Research & Knowledge Exchange Committee; agus buidhnean eile co-cheangailte ri Rannsachadh agus an REF mar a chithear iomchaidh

Seo tuairisgeul air an obair mar a tha e. Sa chumantas thèid beachdachadh air seo bho àm gu àm gus dèanamh cinnteach gu bheil e iomchaidh agus gus atharrachaidhean sam bith a dhèanamh. Thèid seo a dhèanamh leis an neach-obrach agus a' mhanaidsear aige/aice agus mar sin thathas a' sùileachadh gun gabhar pàirt anns na còmhraidhean seo. Tha Sabhal Mòr Ostaig ag iarraidh gun gabh cùisean aontachadh leis gach neach ach far a bheil seo do-dhèante, tha còraichean aig Sabhal Mòr Ostaig air atharrachaidhean ciallach a dhèanamh a rèir tuarastal an neach-obrach às dèidh bruidhinn ris/rithe mun chùis.

An Giblean 2019

Sònrachadh Pearsa

Sgilean	Riatanach	Miannach
Foghlam	<p>PhD ann an cuspair co-cheangailte ri Eòlas Ceilteach no Gàidhlig</p> <p>Deòin a bhith ag obair a dh'ionnsaidh barantas HEA</p> <p>Fianais gu bheilear dealasach a thaobh leasachadh proifeasanta agus pearsanta</p>	<p>Barantas ann an teagasg Àrd-ìre no teisteanas aithnichte le HEA</p> <p>Teisteanas stiùiridh no fianais gun do rinneadh leasachadh proifeasanta a thaobh stiùireadh luchd-obrach</p>
Sgilean Gàidhlig	<p>Làn-fhileanta sa Ghàidhlig</p> <p>Eòlach air a bhith a' leasachadh is a' brosnachadh na Gàidhlig</p>	<p>Teisteanas anns a' Ghàidhlig</p> <p>Fianais air obair le buidhnean Gàidhlig</p>
Eòlas	<p>Sàr eòlas ann an raointean rannsachaidh iomchaidh</p> <p>Deagh eòlas air modhan rannsachaidh is sgilean rannsachaidh</p> <p>Deagh eòlas air teagasg aig ìre Oilthigh</p> <p>Lèirsinn a thaobh rannsachaidh</p> <p>Fianais de stiùireadh ro-innleachdail aig àrd ìre</p> <p>Eòlas air cruthachadh agus neartachadh dhàimhean le daoine aig diofar ìrean</p>	<p>Eòlas practaigeach ann an dreuchdan co-cheangailte ri foghlam Gàidhlig</p> <p>Fianais de chruthachadh sruthan airgid rannsachaidh</p> <p>Eòlas san fharsaingeachd air deagh-ghnè</p>
Sgilean agus Comasan	<p>Sàr sgilean conaltraidh agus eadar-phearsanta</p> <p>Comas daoine a stiùireadh agus a bhrosnachadh gus toirt orra a bhith ag obair aig àirde an cuid chomasan</p> <p>Comas obrachadh leibh fhèin</p> <p>Comas obrachadh ann an sgioba</p>	<p>Sgilean gnìomhachais is cruthachail</p> <p>Cead-siubhail</p>



<p>Eile</p>	<p>Deòin ur sgilean a leasachadh aig ìre proifeasanta mar a chithear iomchaidh</p> <p>Deòin Sabhal Mòr Ostaig OGE a riochdachadh ann an iomadh suidheachadh agus còmhla ri buidhnean aig a bheil ceangail ris a' Cholaiste na a dh'fhaodadh ùidh a nochdadh sa Cholaiste</p>	<p>Cead dràibhidh</p> <p>Deòin a bhith siubhal</p>
--------------------	--	--

Fiosrachadh Eile

- 'S e Sabhal Mòr Ostaig am fastaiche
- Bidh thu ag obair 35 uairean san t-seachdain
- Gheibhear 35 saor-latha sa bhliadhna (làithean poblach nam measg). Cha tèid na làithean a chuingealachadh ach cumar 10 làithean ag àm na Nollaige leis gum bi a' Cholaiste fhèin dùinte. Bidh bliadhna nan saor-làithean a' ruith eadar 1 Am Faoilleach – 31 An Dùbhlachd agus cha ghabh an cumail chun na h-ath bhliadhna.
- Tha siostam measaidh stèidhichte aig a' Cholaiste
- Thathar a' sùileachadh gun gabh luchd-obrach pàirt anns na cùrsaichean trèanaidh riatanach agus gum bi iad deònach an cuid leasachadh proifeiseanta a leasachadh
- Tha Sabhal Mòr Ostaig a' cur taic ri leasachadh sgilean Gàidhlig
- Tha sgeama peinnsein aig an t-Sabhal Mhòr le Scottish Widows agus bidh cothrom aig luchd-obrach clàradh san sgeama àrachais-beatha cuideachd
- Feumar a dhol tro sgrùdadh PVG, seach gur e colaiste a th' ann an Sabhal Mòr Ostaig
- 'S e Sabhal Mòr Ostaig prìomh àite na h-obrach ged a bhios agaibh ri siubhal bho àm gu àm gu coinneamhan is tachartasan. Bhite deònach coimhead ri beagan sùbailteachd airson dreuchd mar seo far am biodh cothrom ann a bhith ag obair an dà chuid bhon taigh agus aig a' Cholaiste.

Fios mu Iarrtasan

Co-ionannachd Chothroman

Tha co-ionannachd chothroman aig cridhe Shabhal Mòr Ostaig.

Iarrtasan

Gheibhear foirmichean-iarrtais an seo.

Tillibh litir agus foirm-iarrtais gu:

Sgiobachd
Sabhal Mòr Ostaig
An Teanga
An t-Eilean Sgitheanach
IV44 8QR

No air post-d gu: obair@smo.uhi.ac.uk

Ceann-là: 5f 24 An Cèitean 2019

Agallamhan: Diciadain 5 an t-Ògmhios 2019

Faodar còmhradh neo-fhoirmeil a chumail le Dr Marsaili NicLeòid, Stiùiriche Roinn an Fhoghlaim air 01471 888 302, post-d: sm01mnl@uhi.ac.uk no An Dr Gillian Rothach, Prionnsapal na Colaiste, 01471 888 200.